

Djoha i la levaya

por Eliezer Papo

Una vez Djohá vido muncha djente ke se van detrás de un sanduk.^[1]

‘Lo ke es esto?’ - se dimandó de sí para sí. Se fue kon eyos.

Está eskuchando. Todos stan avlando de algún sinyor Levi ke era un públiko ufisial, una persona ke amava a la djente i ke siempre dava muncha sidaká, i komo ke “...Oy mos sta deshando para siempre...” i todos stan vinieno a darle el último rispekto.

“Bash üstüné^[2],” disho Djohá, “me vo meter akí, para ver kvando vendrá éste, i si siempre sta dando sidaká, sovre una kvanto i kvanto ke me va a dar agora, kvando sta para partir por siempre”.

Bueno, la levaya^[3] sigie andando, i el buen de nuestro Djohá se va kon eyos, mirando todo el tiempo de ke parte va venir el sinyor Levi. Djohá esta mirando mirando, ma el sinyor Levi non viene.

Djusto en el momento kvando empesaron a bashar el tabut^[4] a la tierra, gritó Djohá kon una boz de dezesperansa: “Onde sta este Levi? Komo si lo englutió la tierra?”

^[1] sanduk: (del turko: sandik: baúl): kasha de muerto

^[2] Bash üstüné: (en turko: bas üstüne): enriva de la kavesa, por favor

^[3] levayá: (en ebreo): funeral

^[4] tabut: (en turko): kasha de muerto